

El dernière dè Zante.

## **Zante èyè l'vôtage.**

Vo l'avèz djà r'marquî:Mettèz Zante dins n'importe qué situation in p'tit côup spéciale,I li arrive ène quinte!

Ca a co sté l'cas diminsse passé,el djoû du vôtage.

Malgrè què ç'est m'visin,Zante è n'vôte nî au min-me bureau qu'mi,donc du n'ai nî assisté à l'affère.Bah,vo l'counnichéz:El lind'main,à l'piquette du djoû, I stoût à no maison pou m'racontér s'n'aventure.Ascout'el:

Mais qu'l f'soût bon ahièr!In soleil pètant,ène température à l'av'nant;çî in vrai pléji dè dallér à pîds dusqu'au bureau d'vôte.Comme ça n'arrive qu'in côup tous les lunes,d'avoûs mi m' bia costume èyè n'cravate.

Du sûs parti dè l'maison invî 9h.Comme ça,pou dix heures,l'affère d'voût yesse liquidée èyè du m'in diroûs rattind Fine au cabaret Miyenne.(Fine,elle nè va foque fai s' « devoir électoral » qu'après messe èyè vo pinsèz bîn què mi,ça m'arrindje.)

El' file d'attente n'î nî trop longue èyè l'djeu dalloût bon train:ène fournée d'quat' personnes quasi tous les trois minutes;bref,d'astoûs dins les temps.

Ouèye coumarâde:ç'es't'adon què l'machine s'a desréglé!

Pou couminchî,I paraît (du n'l'ai nî vu mais on m'la dit) qu'l d'a yun qui s'toût aussi animé à vôtér qu'in cat à traversér in ètang.Du côup qu'on li a donné ses bul'tins,I s'a r'tourné èyè I les a mis téls quéls dins l'urne!

I paraît qu'on n'pût nî fai ça.Il aroût du dallér dins l'isoloir pou fai chènance avant d'erdèposér les papîs.

Donc,les memb's du jury-du bureau-comme on dit-ont du fai ène rédaction: I z'ont du "actér" el'pèripétie.

C'astoût à peine erparti qu'il a co fallu stoppér pou in aût' cas spécial:El' brave djins qui s'présintoût ed'meure dins l'commune despûs 7 mois mais elle n'avoût nî r'çu d'convocation èyè s'nom n'î nî dins l'liste,ni dins l'çienne dè l'aut' bureau pusqu'elle vènoût d'là.

Seûl'mint,au contraire du prumî,ç't'elle-çi,elle voloût vôtér à tout prix.

Donc,il a co fallu tout arrêter pou "actér".Comme d'ai compris,I doit'té fai ça testous inchènes,"actér",sinon,ç'n'est nî valâb'.

A l'huche,el'file couminchoût à s'allondjî in fameux côup mais comme,I f'soût fin bon au soleil,I n'avoût nî trop d'rouspètances.On a quand min-me esté souladjî quand l'çîn qui stoût d'planton à l'intrée a r'couminchî à fai rintrér les djins.

Au momint què mi du rintroûs dins l'salle,PANF!Là,ça s'té l'ponpon!



Du n'sais nî ç'qu'l z'avint'té scaffotté mais toudi est-l qu'l z'ont fait sauté les plombs! Dins l'salle,ça pavoût co dallér mais dins les isoairs,il arôût fallu n'candeye pou trouvé l'bonne case! Eyè in vlà co pou dix minutes,el temps d'trouvé l'compteur,cachî après l'clé pou l'ouvri,r'montér l'tèco èyè.....bîn seûr..... "actér" l'incident!

Dix heures è d'mi:  
Enfin,mè vlà scapé!Mè vlà dèhoûrs!

Pou n'nî pestèlér su les pîds d'l'un l'aut',on vudoût pa in aut' porte èyè au dèbut,d'avoûs pinsé r'vèni su mes pas pou dire bondjoû à in tas d'djins qu'on n'voit foque què dins ces occasions-la.

D'ai bîn rèflèchi èyè du m'sûs dit:Zante,si vo calaudèz co douçi ène demi-heûre,vo n'arèz nî l'temps d'in boire yeune ou deux avant qu'Fine n'arrive avû toutes les interdictions qu'elle vo fait soi-disant pou vo santé.

Conclusion:D'ai fait d'mi-tour èyè du sûs deskindu vire Miyenne!

Françwès.